

Кредит-қаржы ұйымдарындағы жеке тұлғалардың салымдарына кепілдік беру (сақтандыру) жүйелерін үйлестіру туралы келісімге қол қою туралы

Қазақстан Республикасы Үкметінің 2006 жылғы 29 маусымдағы N 599 Қаулысы

Қазақстан Республикасының Үкіметі **ҚАУЛЫ ЕТЕДІ:**

1. Қоса беріліп отырған Кредит-қаржы ұйымдарындағы жеке тұлғалардың салымдарына кепілдік беру (сақтандыру) жүйелерін үйлестіру туралы келісім жобасы мақұлданды.

2. Кредит-қаржы ұйымдарындағы жеке тұлғалардың салымдарына кепілдік беру (сақтандыру) жүйелерін үйлестіру туралы келісімге қол қойылды.

3. Осы қаулы қол қойылған күнінен бастап қолданысқа енгізіледі.

Қазақстан Республикасының

Премьер-Министрі

Кредит-қаржы ұйымдарындағы жеке тұлғалардың салымдарына кепілдік беру (сақтандыру) жүйелерін үйлестіру туралы келісім

Бұдан әрі Тараптар деп аталатын 2003 жылғы 19 қыркүйектегі Біртұтас экономикалық кеңістік құру туралы келісімге қатысушы мемлекеттердің үкіметтері, халықаралық саудадағы жалпыға бірдей қабылданған нормалар мен ережелерді басып ала отырып,

Біртұтас экономикалық кеңістік (бұдан әрі - БЭК) құру жөніндегі үйлестірілген іс-шараларды жүзеге асыру және осы мақсаттар үшін БЭК құру туралы келісімге қатысушы мемлекеттердің жеке тұлғаларының салымдарына (депозиттеріне) (бұдан әрі - салымдар) кепілдік беру (сақтандыру) жүйелерін үйлестіру қажеттілігін растай отырып, төмендегілер туралы келісті:

1-бап

Келісімге қатысушы мемлекеттердің салымдарына кепілдік беру (сақтандыру) жүйесін үйлестіру жөніндегі келісілген іс-шаралардың мақсаты Келісімге қатысушы мемлекеттердің кредит-қаржы ұйымдарындағы салымдарға кепілдік берудің (сақтандырудың) ең үздік халықаралық банктік практикаға негізделген ұлттық жүйелерін құруы болып табылады.

2-бап

Мәлімделген мақсаттарды іске асыру үшін Тараптар кредит-қаржы ұйымдарындағы салымдарға кепілдік беру (сақтандыру) саласындағы нормативтік құқықтық базаны құру жөніндегі жұмысты жүзеге асыру

кезінде ұлттық банктік жүйелердің ағымдағы жай-күйін ескере отырып, мынадай негізгі қағидаттарды басшылыққа алуға міндеттенеді:

кредит-қаржы ұйымдарының салымдарға кепілдік беру (сақтандыру) жүйесіне қатысу міндеттілігі;

кредит-қаржы ұйымдары өз міндеттемелерін орындамаған жағдайда салымшылар үшін қолайсыз салдардың туу тәуекелін азайту;

салымдарға кепілдік беру (сақтандыру) жүйесі қызметінің ашықтығы; салымдарға кепілдік беру (сақтандыру) жүйесіне қатысушы - кредит-қаржы ұйымдарының тұрақты жарналары есебінен салымдарға міндетті кепілдік беру (сақтандыру) қорын қалыптастырудың жинақтаушылық сипаты;

салымдар бойынша өтемақы төлеудің (төлемнің шектік мөлшері) шектеулі сипаты; салымдарға кепілдік беру (сақтандыру) жүйесін қаржыландыруға және қолдауға мемлекеттің қатысуы;

шетел азаматтарының немесе азаматтығы жоқ адамдардың салымдарына да Келісімге қатысушы мемлекеттердің азаматтары сияқты шарттарда кепілдік беру (сақтандыру).

3-бап

Кредит-қаржы ұйымдарындағы салымдарға кепілдік беру (сақтандыру) саласында нормативтік құқықтық база құру жөніндегі іс-шараларды үйлестіру мақсатында Тараптар осы саланы заңнамалық реттеудің жоспарланып отырған және жүзеге асырылатын өзгерістері туралы бір-бірін хабардар етуге міндеттенеді.

4-бап

Тараптар қажет болған кезде салымдарға кепілдік беру (сақтандыру) саласында, оның ішінде кредит-қаржы ұйымдарындағы салымдарға кепілдік беру (сақтандыру) саласындағы нормативтік құқықтық базадағы БЭЖ құруға кедергі келтіретін елеулі айырмашылықтар мәселелері бойынша Тараптар пайдаланатын негізгі тәсілдер бойынша өзара консультациялар өткізуге міндеттенеді.

5-бап

Осы Келісімнің ережелерін түсіндіруге және/немесе қолдануға қатысты Тараптардың арасындағы даулар мен келіспеушіліктер Тараптар арасында консультациялар және келіссөздер жүргізу жолымен шешіледі.

Келісімге қол жеткізілмеген жағдайда Тараптардың кез келгені дауды БЭЖ шеңберіндегі Дауларды шешу жөніндегі органға шешуге бере алады.

6-бап

Осы Келісімге ескертпелер жасауға жол берілмейді.

7-бап

Кез келген мемлекет осы Келісімнің қатысушысы бола алады.

Осы Келісімге қосылудың шарттары осы Келісімге қатысушы мемлекеттер мен қосылатын мемлекет арасында жасалатын халықаралық шартта айқындалады.

8-бап

Осы Келісімге Тараптардың өзара келісімі бойынша хаттамамен ресімделетін өзгерістер мен толықтырулар енгізілуі мүмкін.

9-бап

Осы Келісімнің күшіне ену және одан шығу тәртібі Біртұтас экономикалық кеңістік құру жөніндегі халықаралық шарттардың күшіне ену және олардан шығу тәртібі туралы хаттамада белгіленеді.

200 жылғы <__> _____ қаласында орыс тілінде бір түпнұсқа данада жасалды. Түпнұсқа дана Депозитарийде сақталады. Депозитарийдің функциялары БЭК комиссиясына берілгенге дейін Қазақстан Республикасы осы Келісімнің Депозитарийі болып табылады.

Депозитарий осы Келісімге қол қойған Тараптардың әрқайсысына оның куәландырылған көшірмесін жібереді.

<i>Беларусь Республикасының</i>	<i>Қазақстан Республикасының</i>
<i>Үкіметі үшін</i>	<i>Үкіметі үшін</i>
<i>Ресей Федерациясының</i>	<i>Украинаның</i>
<i>Үкіметі үшін</i>	<i>Министрлер Кабинеті үшін</i>